



Al impià il faro de altane inluminant la superficie dal lago.

Di gnot.

Di vuardie intun piçul presidi in Albanie, a 22 agns.

Robis orendis a jerin capitadis inte ritirade tal mieç de criure.

I uficiâi a devin il colp di grazie ai lôr stes soldâts ferîts e za mieç sapulîts tal pantan.

I grêcs no ur vevin dât tregue e cumò ancje i partigjans albanês a profitavin de disfate taliane.

Aldo al notà la aghe increspâsi: veju che a rivavin viers di lui, nadant e cul pugnâl tai dincj!

Une rafiche di metraie cuintri de aghe!

Podopo nissun rumôr.

Ju veve netâts...

Une gnot cence sierâ un voli e, pôc prime de albe, il cambi.

“Altolà, chivalà?”

“Capomuta con cambio!”

Al jere un cuarp in rive al lago: un vecjo partigjan shqipetaro ferît a lis gjambis ma ancjemò vîf.

Il sergjent che al comandave la mude al metè fin a la sô agonie cuntun colp di revolver.

Aldo al cjalave chel om muart, la sô muse che e mostrave fierece e lis sôs mostacjis... no, no, a cjalâlu ben chel om nol jere vecjo: al veve massime 45 agns, come il pari di Aldo, anzi, un pêl i sameave...

Al jere muart pe libertât de sô patrie. Il so cuarp bandonât su la rive, cence sapulture.  
E... se Aldo ta chê gnot nol ves fat che metraiment... jo no sarès chi a contâus cheste storie.

***di Checo Tam***

Par condividi:

[Facebook](#)

[WhatsApp](#)

[Telegram](#)

[Print](#)

[Email](#)